

22. januar 2016

UPA2016/133

Inatsisartut suleriaasianni § 33 naapertorlugu Inatsisartut aalajangiiffigisassaattut siunnerssuut imaattoq matumuuna saqqummiuppara:

Namminersorlutik Oqartussat tamakkiisumik piginnittuullutik aktiaateqarluni ingerlatseqatigiiffiini ataasiakkaani siulersuisunut ilaasortassanik toqqaasarnermi nunatsinni najugaqavissut amerlanerussuteqartut ilaasortaasalernissaannik Naalakkersuisut aalajangersagaliortut inatsisissamik UPA2017-imi saqqummiussassamik siunnersuusioqqullugit peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaqa Suka K.Frederiksen, Siumut)

Tunggavilersuut:

§ 37 aqqutigalugu Naalakkersuisunut apeqquteqaat 301-imut 14-01-2016, Sagsnr. 2015 – 17122 apeqqut nr. 10-mut akissuteqaammi erserpoq Namminersorlutik Oqartussat aktiaateqarluni ingerlatseqatigiiffiutaani siulersuisuni ilaasortaasartut amerlarnertigut nunatsinni najugaqavissut ikinnerussuteqartut.

Assersuutigalugu § 37 naapertorlugu apeqquteqaatima akissutitaani erserpoq, ukiup aallartinnerani aalassassimaartitseqisumi Great Greenland-imi siulersuisut tallimaasut akornanni marluk nunaqavissuusut sinneri pingasut Danmark-imeersuullutik. Taamatutaaq Royal Greenland eqqarsaatigalugu Naalakkersuisut toqqaagaani siulersuisunut ilaasortat arfiniliusut akornanni marluinnaat nunaqavissuullutik, Namminersorlutik Oqartussat suliffeqarfiutaani nalinginnaasumik assiliaq tassa taama isikkoqarpoq.

Pingaarteqarsoraara nuna siulersuisuuffiginiagaq tassaasariaqartoq ulluinnarni qanimut inooqataanikkut ilisimaqarfisariaqartoq.

Innuttaasut atugaat pitsanngorsartuarnissaat siunertaralugu atuisut atugaannut iluaqutissamik eqqarsarnissaq pisariaqarpoq, tamannalu angutserlugu iliuuseqartariaqarpugut.

Ingerlatseqatigiiffiit tassaapput inuiaqatigiinnut kiffartuussinermik ingerlatsiviusut, inuuniarnikkut tamaginnut annertuumik sunniuteqarfiusartut, tamannalu pingaartillugu suliniuteqarnissaq qulakkeerneqartariaqartoq.

Qujanartumik ukiuni kingullerni kalaallit qaffasinnerusunik ilinniagaqartartut amerliartuinnarput, taamatullu misilittagaqarluartut suleqataalluartaatut nunatsinniillutik.

Ilinniarsimasut amerliartortillugit ilisimasaat atorlugit periarfissaqartitsinissaq nunatsinnut pissaaffiuvoq qinikkatut aqqutissiuuneqartariaqartoq.

Tulluusimaarutissaraarput suliffeqarfissuit angisuut soorlu KNI-tut ittut nunatsinni najugaqavissunik amerlanerussuteqarfiusumik siulersuisoqarmata, tamatuma takutippaa piginnaasat, ilinniakkat, ilisimasassat allanut sanilliullugit ajornerunngitsut nunatsinni pigineqartut, taamaaliornikkuttaaq ilisimasat nunatsinniiginnarnissaat qulakkiissagatsigu – tamaattumik

pisussaaffiliusumik periarfissaqartitsinissaq angutserlugu matumuuna aalajangiiffigisassatut siunnersuummik ingerlatitsivunga.

Siunnersuutip pisortanut aningaasatigut allaffissornikkullu kinguneqaatissai:

Aningaasartuutit siunnersuummi najoqqutassanut pilersitsinermi atugassat inuup ataatsip ukiumut naammassisinnaasaani ukiup affaanit annertunerunnginnissaat naatsorsuutigineqarpoq, aningaasartuutit iluaniillutik nutserititsineq, tusarniaaneq, inatsisitigullu aaqqisuussinerit il.il.

Siunnersuutip namminesrorlutiik inuussutissarsiortunut aningaasatigut allaffissornikkullu kinguneqaatissai:

Soqanngilaq

Siunnersuutip innuttaasunut aningaasatigut allaffissornikkullu kinguneqaatissai:

Soqanngilaq